



Komunikadu Imprensa

Distritu Baucau

17 Dezembru 2018

Suku Uma Ana Ulu-Venilale, Baucau primeira-ves hetan treinamentu kona-ba asuntu direitu labarik no asesu ba justisa formál

Iha 11 Dezembru 2018, Judicial System Monitoring Programme (JSMP), realiza treinamentu iha Suku Uma Ana Ulu, Sub-distritu Venilale, Distritu Baucau. Partisipante sira ne'ebé partisipa iha treinamentu ne'e mai hosi estrutura suku no lider komunitáriu sira hosi Aldeia Kaihula, Aldeia Nunu Doku, Aldeia Osogigi no Aldeia Venilale ne'ebé halo-parte ba teritoria Suku Uma Ana Ulu nian. Partisipante sira hamutuk ema nain 30 ne'ebé kompostu hosi feto nain 19 no mane nain 11.

Treinamentu ne'e ho objetivu atu hasa'e koñesimentu komidade sira nian kona-ba direitu labarik partikularmente iha área relevante sira kona-ba direitu ba moris, direitu ba hela fatin, direitu ba liberdade, direitu ba edukasaun, direitu atu la hetan diskriminasaun. Aleinde ne'e treinamentu ne'e mós fó biban ba JSMP atu informa kuadru legál aplikavel relevante no importante sira kona-ba labarik relasiona no prevelense krime sira hasoru labarik sira ne'ebé durante ne'e akontese iha Timor-Leste. Purezemplu krime sira ne'ebé afeita ba labarik sira hanesan violasaun seksuál, abuzu seksuál ba menór, maus tratus ba menór, prostituisaun infantil no la halo tuir obrigasaun alimentár.

“Lideransa komunitáriu sira iha área rural hasoru dezafiu oioin atu asesu ba informasaun ne'ebé kredível kona-ba instrumentu legál sira ne'ebé asegura no fo protesasaun ba direitu labarik sira nian iha familia, aldeia no suku sira. Tanba ne'e atividade treinamentu hanesan ne'e, nu'udar meu ida atu hasa'e no haklean sira nia koñesimentu iha area relevante sira kona-ba direitu labarik no provizaun relevante ne'ebé proteze labarik sira” dehan, Diretór Ezekutivu JSMP, Luis de Oliveira Sampaio.

Xefe Suku Uma Ana Ulu, Sr. Vicente de S. Boavida, iha ninia abertura, expresa nia agradesementu ba JSMP nia prezensa tanba iha períodu mandatu ba dala tolu ona hanesan xefe suku iha suku ne'ebá, hamutuk ho nia komidade sira foin primeira-ves simu treinamentu kona-ba direitu labarik no prosedimentu legál sira relasiona ona ho krime ne'ebe hasoru labarik sira inklui krime ho natureze maus tratus ba menór iha kontestu relasaun familiár nian.

Kestaun importante sira ne'ebé partisipante sira foti durante treinamentu ne'e mak kona-ba direitu labarik sira ne'ebé inan-aman abandona no iha kazu balun sira temi mós relasaun abandona entre laen ba feen. Aleinde ne'e sira mós levanta kestaun no preokupasaun sira kona-ba kazu sira balun ne'ebé lori ba tribunál maibé aplika deit ho pena suspensu (pena suspensaun).

Hatan ba perguntas sira ne'e, JSMP responde katak, lei, permite inan husi oan sira atu bele ba hato'o keixa iha Ministériu Públiku atu bele hahu prosesu kasu refere. Tuir artigu 225 Kódigu Penál konsidera hanesan krime la halotuir obrigasaun alimentár.

Relasiona ho perguntas kona-ba pena suspensaun, JSMP esplika tuir artigu 68 Kódigu Penál (KP) katak suspensaun ne'e mós hanesan kastigu konkreta ida. Suspensaun signifika sira simu sentensa ka kastigu maibé kondendu ne'e fizakamente la tama prizaun. Mesmu nune'e, durante períodu suspensaun, arguidu labele komete kualker krime. Bainhira arguidu durante períodu suspensaun arguidu komete fali krime ruma tenke komunika fali ba autoridade polísia ne'ebé besik nune'e bele apresenta ba Ministériu Públiku (MP) hodi halo revogasaun ba nia pena no arguidu bele kumpre pena ne'ebé Tribunál aplika ona ba nia. Aleinde ne'e iha tempu hanesan polísia liuhosi autorizasaun ka delegasaun MP sei halo investigasaun ba krime foun ne'ebé arguidu komete.

Liutan, JSMP subliña katak JSMP mós preukupa no kestiona dalabarak ona kona-ba aplikasaun pena prizaun ho suspensaun, tanba iha kazu barak tantu arguidu no comunidade iha jerál la konsidera suspensaun nu'udar forma ida hosi kastigu ne'ebé suspende deit ninia ezekusaun. Tanba ne'e iha okazisaun barak ona JSMP rekomenda ba autoridade judisiáriu sira atu bainhira aplika pena suspensaun tenke inklui mós dever adisionál sira tuir artigu 69 iha Kódigu Penál ka regra ba konduta tuir artigu 70 KP, no suspensaun ho akompañamentu/monitorizasaun.

Iha sesaun enseramentu, xefe suku agradese ba JSMP tanba durante loron ida estrutura suku sira hamutuk ho comunidade bele aprende materia importante sira relasiona ho direitu labarik ho nia kadru legál sira. Aleinde ne'e treinamentu ne'e mós bele fasilita sira kumpriende sira nia dever nu'udar inan-aman no asuntu importane sira seluk ne'ebé liga ho obrigasaun atu tau matan, protesau ba labarik sira husi kualker violénsia no diskriminasaun hotu-hotu hasoru labarik.

Partisipante sira rekomenda ba JSMP katak se iha possibilidade iha futuru, bele continua atualiza informasaun relevante sira kona-ba lei no sistema justisa iha jerál atu nune'e comunidade iha area rurál sira asesu ba desenvolvimentu importante sira iha setór justisa nian. Aleinde ne'e tanba normalmente knaar sira hanesan autoridade lokál sei iha mudansa tuir ninia tempu, informasaun sira ne'e bele ajuda lideransa komunitáriu sira atu halo servisu ho efektivu liu.

Programa ne'e realiza tanba hetan apoiu Fundu hosi Embaixa Canada iha Jakarta-Indonezia.

Atu hetan informasaun liutan bele kontaktu ba:

Luis de Oliveira Sampaio

Diretór Ezekutivu JSMP

E-mail: luis@jsmp.tl

Telefone: 3323883 | 77295795